



QUÆSTIO MEDICA, 22
 CARDINALITIIS DISPUTATIONIBUS
manè discutienda in Scholis Medicorum, die Jovis
19 Martis 1722.

M. PETRO LE TONNELIER,
 DOCTORE MEDICO, PRÆSIDE.

An præcavendis morbis convulsivis frugalitas?

I.

QUAM infelicitè nascitur homo ! nunquid quantò dignitate superior cæteris animantibus, tantò iisdem morborum omnium colluvione inferior ? Diversos vitæ ejus gradus percurras ; quid miserius ? De maternis ostiis inermis egreditur. Ululatu fœmineo & vagitibus ortum suum signat. Crescit ille, crescit fortis humanæ incommoda. Jam adultus, quantas proh dolor ! ærumnas experitur ! undequaque imminet improvisa pericula ; feroces vix componit motus. Conversis studiis, ætate virili non felicior. Quàm varios patitur manes, quàm furentibus jactatur procellis ! Dum quærit opes, amicitias ; dum inservit honori, novo æstu turbatur animus, alio sub sole terras lustrat, vasta remis fodit æquora, togæ & belli labores suscipit anhelus. Tandem rapidè in deterius mutatur, senescit obrutus miseriis. Interim morborum omnium fœcunda evolvuntur germina, quæ per totos artus diffusa flaccidam agitant molem, donec nox incubat atra. Singulis sua ultima dies, quam præterire nemini datum, placidè ad illam pervenire solis temperatissimè viventibus. Constituit Deus nostræ durationis apicem, & nostræ vitæ terminos. Ut illos gula dimidiare potest, debita victûs ratio servare non impar, quidquid contra jactitent Medicinæ hostes insensissimi. Prævidit quidem Omnipotens intemperantiæ vitia, non præfinivit. Suo igitur arbitrio relictus homo, præcocem interitum si declinare voluerit, caveat ne det seipsum præcipitem, crapulâ & vino ; ab æscis multis consultus absteineat. Hac arte corpus tot machinis stupendis instructum, tot mirandum functionibus, diu servabit incolume. Tenui victû, solidorum consona compages ; fluidorum decens copia & reciprocatio ; spirituum animalium concinnæ ordinationes. Illorum ope substantia corporis expers cum materiali copulatur, utriusque felix necessitudo mirè sustentatur. Tàm laudabilis corpus inter & animam harmoniæ, quæ am Dignus Senex & Galenus symetriad vocant, omnium actionum decus & robur præ se ferentis causa unica, effectiva & conservativa salubris victûs ratio. Illâ posita ; spiritus semper sociabiles & amici, nullam



2

seditionem molientes, nec à debitâ crâsi recedentes, constanti affluxu & benigno nervosum genus irradiant; motum tardiorum, celeriorum, fortiorum, debiliorem partibus inferunt, prout earum mechanica postulat, aut voluntatis imperium exigit.

I I.

PRISCA gens mortalium animi dotibus eximia, corporis statu spectabilis, in bene vivendi normâ, à diatrâ scilicet, lætos imperturbatâ serie exhauriebat dies. Lentè mortalium vita aliquid detrimenti patiebatur. Ejus stamina ad Nestoreos annos feliciter producebantur, utriusque sexûs splendebant lepores. In debitâ victûs ratione mortales commendabat animi venustas illæsa. Quis frontis honos! quæ gratia! Quàm blanda & incolumis gænarum cõditio! Quantum robur circa pectus athenum! Quæ membrorum congrua proportio! Qualis illorum herculeus vigor! Non tempus edax frontem rugis sulcabat, nec ex utrâque parte recedentes genæ, pelles videbantur; non quâ parte solent rubescere, purpurissò indigebant mulieres, vegeti sanguinis loco: Non buxeus illarum calor, non viridis: Non calvos & portigine fædos adscititia cæsaries fraudulenter adornabat, Imò sine lege capilli, & sine pulvere odorato, elegantius unumquemque decorabant. Quæ omnia corporis & animi ornamenta ut uni accepta referas frugalitati, disce antiquæ abstinentiæ documenta, quâ usi fuere veteres. Vinum bibisse mulieribus perinde erat, ac si in adulterio deprehensæ; cum illis sæpè basiis ludebant viri, ut ore explorarent, an illarum spiritus acer. Si hydropotæ mulieres, viri abstemii. In militiâ vinum interdictum apud multos populos, ex instituto Platonis, nisi sacrorum causâ, Epicurus ipse voluptatis assertor acerrimus, frugali victu & modesto contentus, aquâ & pane hordeaceo, jure nigro, victum quæsit; non quod voluptates averteretur, sed quod in tenui victu plus voluptatis illecebrosæ se experiri aiebat. Eadem vigeat Athenis victûs ratio: Salsamenta juvenibus apponere criminosum. Tantæ frugalitatis Philosophi omnes, ut mensam, quamvis parcam, omninò vacuum tolli non sinerent. Si secunda fortè mensa daretur, mel tantum, poma, caricæ. Platonis cœna laurissima, olera, legumina. Quid de Curio Dentato tot dignitatibus insigni, tot victoriis claro, qui sæpè solis rapis obsonium parare inventus est? Quid de Lycurgo edicta, leges de coercendis epularum sumptibus sanciente? Multos alios non ostento, quia plures. Illorum vestigiis cautus insiste; non properata erit senectus, non effæto corpore præmaturè laxa cutis & tremula; imò licet ævi plenus inexhausti eris vigoris, & ultrâ hodiernam valentiam conspicuus.

I I I.

UNUMQUEMQUE sua vexet cura, omne vitium martyres suos habet. Ingluviei obnoxios torquet spasmus, cruciant morbi convulsi. Dapibus indulgentes, etiam si firmo & robusto corporis habitu; etiam si mole grandiores, sub pondere vitiosæ diatræ gemunt & syderantur. Illorum spiritus effræni & indomiti diras tempestates commovent. Non amplius homo, ut Galenus ostentat, in toto animalium genere medium temperie tenet. In illo, ut ita dicam, abolita creatoris sapientia. Cor ejus resilit & tumultuatur; fluidum spirituosum exlex debacchatur & furit. Hinc subsultus membrorum, strangulatus, phlogoses, asthmata convulsiva, vertigines, somnolentiæ, vigiliæ. Prava diatræ, si diu perseveret, oleum camino adjicit. Tunc mentis angor, visiones terrificæ, absque febre deliria recurrentia; in dies magis ac magis stupenda explicantur symptomata sibi

invicem contraria, & tam specie variantia, quàm nec Protæus lustr unquam : Sæpè enim in quibusdam partibus spirituum animalium intercluduntur semiitæ; tunc sub cinere dolofo iidem spiritus ignem suscitant, & fracto obice, furibundi catervatim irruunt per multas regiones. Unde dolores atrocissimi, horrendæ convulsiones, Epilepsiæ, Apoplexiæ, incendia multa, dum aliæ partes languidæ rigent, frigescent, spiritibus aliò raptis. Modò totum nervosum genus ita enormiter comploditur, ut nullis partibus parcat. Tandem intestinus ille hostis, incola cerebri, cruciantis ita frangit animi robur, ut Dæmonas multi credant se in corpore gestare. Tot mala, tot funesta incommoda vitant sobrii, declinant temperantes paucis contenti; iis enim aluntur quæ naturæ sunt familiaria, & re, non nomine sunt alimenta: nocet multiplex cibus & in perniciem ducit. Intemperantia sanguinem inquinamentis inficit, Cerebrum enervat, in eoque fodinam acrem, salinam, nimis elasticam scelesto commercio producit. Totæ ejus substantia depravatur, illius laxantur pori. Sic particule heterogeneæ vellicantes, agrestes, iniquo affluxu non represso, illos pervadunt. Hinc spiritus fermento internecino saturati crudeliter exiliunt, & quidquid delirant, miserum plectitur nervosum genus.

I V.

QUID QUID in horas vitæ detrahitur, per alimenta ut cumque restituitur. Illorum ope portionis amissæ perpetua reparatio partibus elapsis consentanea. Parcæ dapes scilicet, fitmant bene habitos, renovant defectos, fastidiosos ad appetentiam revocant, omnesque ad laborem durabiles efficiunt: unde cibi mediocritatem postulat Divus Senex, quæ neque infra, inquit, neque supra modum excedat. Conveniens enim cum convenienti cohereret; tunc confluxus una, conspiratio una, consentientia omnia. Helluo indocilis regulam pati, ollæ ferventis amans, neque paucis, neque melioribus utitur, jucundè sapit deteriora, eleganter esurit, sitit pretiosius, esculentorum varietati licentius obsequens sæpè. Quidquid à recepto usu alienius inhiat, & ut titilletur acrius, variis haustibus ardentem sitim incassum lavare querit. Quî nostris malis cumulus non accederet! Tanta est conviviorum luxuries, quantum & ipsi epulones non probant. Nostris ne temporibus valentior mollissimorum hominum ventriculus? An in illo vividior alimentorum subactio? O nefariè eruditæ & patentes gulæ à coquo laudem turpiter querentes! O terribiles ventres, qui tot agros bestiis, tot silvas avibus spoliunt vix è matre eductis, quorum non justam ætatem expectant festinantes gulæ! Hæ nocibiles primitiæ, si ad gustum edentium, si ad solatium palati; certè ad nervosi generis suplicium; sed in illis, pretium & novitas placent. Quàm opulenter delirant gulosi! Illorum triclinia quasi templa adornantur. Apud illos abaci gemunt sub pondere argenteæ supellectilis, vasa aurata, doctâ arte elaborata, & variæ capacitatis corruscant; patinæ, lances, orbes, operosæ cælaturæ materiam superantis, undique fulgent. Hûc igitur accedite lurcones, gustationis & promulsidum odor vocat. Vos acceffit epuli Dominus; trinis ferculis cœnam parari jussit, & pyramides erexit convivarum stomachis. Cœnate, jus est cœnæ. Ad lautiores cibos mox secunda dabitur mensa. Ecce matas pecudes, perdicum, leporum, escarum omnium strues servorum affert frequentia, ciborum præfecto præeunte; dapes scissor agreditur, lacerat, & ad numerum cœnantibus dividit. Hinc & illinc sæcundi calices lucent, & plûs vini in mensam affunditur, quàm quis in cellâ habet. Jam convivæ ebris proximi cantilenis gaudent & exultant. Ecquid dentes otiosi! num dapes resposant palato! Quid igitur in tertio ferculo novis gulæ irritamentis onerato!

Quid in summâ mensâ bellariis conquestis, & vario colore formata, ubi unicuique iterum exsiccanda lagena assignatur, & liquoribus omnigenis ardentibus, patulis faucibus litandum est? In tam diversis, tam vitiosis succis male elaboratis stomachum gravantibus, non minima certè disjunguntur à minimis, non spirituosâ à fœculentis, non blanda à nocentibus. Indiscriminatum illi insolentes ventriculi fœtus horrendi, poros cerebri pervadunt, ebullit sanguis, æstuant spiritus, multumque faciles nervi in omnem partem stolidè rapiuntur.

V.

DE victûs ratione primus scripsisse gloriatur Hippocrates: A me, inquit, inventa victûs ratio à nullo adhuc antea tentata, & mihi inventori pulchra videtur; pulchra equidem præcognitio illa, quæ antequam ægrotent mortales, in eodem servat statu; urque prior & antecedit alias Medicinæ partes, etiam dignitate major. Unde Galenus: quicumque ægrotabilia novit, hunc præcipuè salubria non latere debent, quæ nihil aliud sunt, quàm perfectio prima, quæ bonum & præsentem statum custodit. Tanto beneficio carent homines ventri dediti, illis auxiliares manus sæpè præbendæ. Nec te fallat carnulenta illa, quam circumferunt, rotunditas. Mireris tantum, ne invideas. Stare videntur, re ipsâ non stant. Tantumque differunt ab antiquâ gente, quantum à vernis frondibus autumnales, quas levis aura discutit. In æscis multis erit infirmitas magna, ex sacr. codic. Ab illis vel nimis rigidæ fibræ crispantur, vel laxæ nullius sunt vigoris. Imitetur ergo saltem, quas natura docet, pecudes, homo. Illæ docent agendo: nam siue terrestres, siue squammigeræ, non omnem succum alibilem studiosius appetunt, sicuti helluones. Horum itaque funerati nervi nullam corroborant partem. Ruri degentes, qui naturam sequuntur ducem, simplici victu contenti, proxima non spernunt. Ideò spirituum animalium compage affabrè constituta donantur. Hujus discriminis causam postulas? Urbanorum coquos numera, habebis. Cœnarum ergo salubrem artem si velis assequi, prandio modico, deambulatione, fame obsonio para, ut Anyti reus. Ex longinquo orbe & magno censu comparata alimenta rejice; ubi nascimur natura simplex parat cibos. Non sumptuosâ sit mensa, nec diu te teneat: lecti sint viri, lectus sit locus, & licet cibi pauci, non totos absorbe; vacuis venis nihil nisi leve committe: quæ alvum humidant elige; illa iratum ventrem placant, alia pervellunt. Ne offeras, inquit Divus Senex, quæ ventrem attollunt, & flatum creant. Convulsionibus tentantur iis vescentes. Sanctum Chrysof. audias: Ventri servientes animi robur & constantiam dissolvunt. Sic & Galenus, crassus venter subtilem spiritum non parit. Ne damnosè & meraciùs bibas, diluissimæ sint potiones, tantum dentur poscentibus. Cave ne sordida mappa corruget nares, calices & lanx ostendant te tibi; sermones tandem sint præfci Catonis. Si tali victu utaris, mens erit sana in corpore sano, & longa servabitur adolescentia. Qui Philosophiam illam Pythagoricam respuunt Medici, faucibus divitum grati, verè histriones, non morbos debellant, imò dulcibus alunt venenis, & morbis convulsivis assuefaciunt corpora, iis non liberant.

Ergo præcavendis morbis convulsivis frugalitas.

Proponebat Parisiis GEORGIUS-ANTONIUS TARON DE LOMMEAU, Bajocensis, Baccalaureus Medicus, A. R. S. H. 1722.
à sextâ ad meridiem.

Typis J. QUILLAU, Universitatis & Facultatis Medicinæ Typographi.